



PREZIDÉNSIA KONSELLU MINISTRUS

VI GOVERNUN KONSTITUSIONÁL

DÍLI, LORON 21 FULAN-ABRIL TINAN 2015

KOMUNIKADU IMPRENSA

Sorumutuk Estraordináriu Konsellu Ministrus Ioron 21 fulan-abríl 2015

Konsellu Ministrus hala'o sorumutuk estraordináriu tersa-feira ne'e, Ioron 21 fulan-abríl 2015, iha sala sorumutuk Konsellu Ministrus nian, iha Palásiu Governu, iha Díli, no aprova ona diploma haat no analiza ona apresentasaun ida:

1. Dekretu-Lei ne'ebé aprova Sistema Nasionál Pagamentu nian sira

Diploma ida ne'e determina obrigasaun Banku Sentrá Timor-Leste nian (BCTL sigla iha lian portugés) atu estabelese, regula no fiskaliza Sistema Nasionál Pagamentu nian hothotu (SNP), hodi promove ninia efisiénsia no seguransa, no atu hamenus risku sira, liu-liu sira ne'ebé sistemátiku, no atu aumenta transparénsia no protesaun ba kliente sira. Iha diploma ne'e define funsaun no podér BCTL nian sira atu regula no fiskaliza sistema pagamentu nasionál, no estabelese mos rejime autorizasaun nian ida ba ema hirak ne'ebé kaer no hala'o servisu pagamentu nian. Diploma ne'e regula mós likidasaun, kompensasaun no karáter definitivu pagamentu nian sira no pagamentu eletróniku no moeda eletróniku.

2. Alterasaun daruak ba Lei Órgaun sira Administrasaun Eleitorál nian

Proposta Lei ida kona-ba tema ida ne'e Governu Konstitusionál V aprova tiha ona, iha sorumutuk Konsellu Ministrus iha Ioron 21 fulan-outubru 2014, no haruka ona ba Parlamentu Nasionál atu diskute no vota. Ho tomada pose Governu foun nian, no tanba diploma ida ne'e seidauk hetan votasaun hosi Parlamentu Nasionál, maka tuir Konstituisaun, Governu ida ne'e tenki aprova proposta foun ida.

Alterasaun ne'e, lei konsagra possibilidade atu atribui insentivu finanseiru ne'ebé bele kontribui ba prestasaun ida kualifikadu liu servisu púbkluku nian iha área eleitorál.

Iha elaborasaun diploma ida ne'e, tau mós iha konsiderasaun, komentáriu no sujestaun hirak ne'ebé hato'o liuhusi Parlamentu Nasionál no Prezidente Komisaun Nasionál Eleisaun nian.



Palácio do Governo,
Avenida Presidente Nicolau Lobato,
Dili, Timor-Leste

pcm.gov.tl@gmail.com
(+670) 33 310 608

3. Dekretu-Lei ne'ebé aprova Orgánika Ministériu Administrasaun Estatál

Ministériu Administrasaun Estatál, tuir Orgánika Governu Konstitusionál VI nian, nu'udar órgaun sentrá Governu nian ne'ebé responsabiliza ba konsesaun, ezekusaun, koordenaun no avaliasaun ba polítika, ne'ebé Konsellu Ministrus define no aprova ona, ba área hirak kona-ba podér lokal, descentralizasaun administrativa, organizaun no ezekusaun prosesu eleitorál no referendu nian sira, kona-ba promosaun ijiene no organizaun urbanu no kona-ba klasifikasun no konservaun dokumentu hirak ofisiál ho valór istóriu.

Governu Konstitusionál VI nian, Ministériu Administrasaun Estatál, la'os ona responsável ba jestaun programa públiku oin-oin kona-ba promosaun dezenvolvimentu lokal no rurál, ne'ebé maka muda fali ba Ministériu Planeamentu no Investimentu Estratéjiku.

Instituto Nasionál Administrasaun Públika maka sei sai hanesan organizmu autónomu Ministériu Administrasaun Estatál nian, iha ámbitu Administrasaun Indireta, hamutuk ho Sekretariadu Tékniku Administrasaun Eleitorál no Arkivu Nasionál.

4. Dekretu-Lei ne'ebé aprova Orgánika Ministériu Defeza nian

Ministériu Defeza, tuir Orgánika Governu Konstitusionál VI nu'udar órgaun sentrá Governu nian ne'ebé mak responsável ba konsesaun, ezekusaun, koordenaun no avaliasaun polítika nian tuir define no aprova ona hosi Konsellu Ministrus, ba área kooperasaun nasionál no kooperasaun militar.

Husi kedas restaurasaun independénsia, Timor-Leste nafatin foti pasu desizivu sira ba-ihá setór defeza nasionál nian. Iha Governu Konstitusionál IV no V, ho razaun atu hakbiit seguransa nasionál, haree katak presiza halo aproximasaun ida ba setór rua ne'e.

Ho hakotu Governu Konstitusionál V estrutura orgánika Ministériu Defeza no Seguransa nian halakon tiha ona, maibé presiza halo orgánika foun ida. Tanba ne'e, Governu Konstitusionál VI iha tinan 2015, setór defeza no seguransa nian hetan fali estrutura ministeriál independente ida, fila fali ba estrutura orijinal hodi haforsa servisu spesífiku sira setór ida-idak nian.

Estrutura ministeriál ne'e hatán ba ezijénsia hodi hakbiit defeza nasionál, liuliu iha aspetu militar, ne'ebé hatudu estrutura simples ida, maibé metin no firme nafatin, ho rekursu umanu sira ne'ebé mak iha kualifikasaun, ne'ebé hatudu ba nesesidade réal sira implementasaun estratéjia defeza nian, hodi la haluha atu halo koordenaun interministeriál ne'ebé mak importante ho setór seguransa, hodi orienta hosi prinsipiu sira subsidiariedade no komplementariedade entre F-FDTL, forsa no servisu seguransa nian sira.

Konsellu Ministrus mós análise tiha ona:



1. **Aprezentasaun “Diagnóstiku Nasionál nian”**

Ministru Estadu, Koordenadór Asuntu Administrasaun Estadu no Justisa no Ministru Administrasaun Estatál, hamutuk ho Gabinete Sekretáriu Estadu ba Fortalesimentu Institusionál, apresenta ba Konsellu Ministrus “Diagnóstiku Nasionál”. Aprezentasaun ne’e ninia objetivu atu koñese problema sira iha Administrasaun Públika no ninia solusaun sira hodi hadi’a di’ak liután no hakbiit instituisaun.



Palácio do Governo,
Avenida Presidente Nicolau Lobato,
Dili, Timor-Leste

pcm.gov.tl@gmail.com
(+670) 33 310 608